

nunciare [a] quaedam, fortasse non omnia vera, praecipit. Libenter obedierunt [b] tales discipuli dictis chari magistri [c]. Audito itaque frequenter reiterato, quod comes cum Ravennatibus composuisset [d], quibus et Faventinos qui castrum custodiebant dare debebat [e] stulti, quorum sententiae in civitatibus praevalere quandoque consueverunt, furiose arma sumentes, contra voluntatem et praecepta consulum, Cuium festinaverunt; quibus et qui castrum custodiebant, nimis cito creduli, portas aperuerunt, omnes muros et alia aedificia in fossatum laborantes prosternere. Tanto autem et tali opere incepto, ita omnes in brevi unius effecti sunt voluntatis, quod sapientes cum insipientibus [f], senes cum junioribus, viri cum mulieribus totum penitus exarserunt destruere castrum, omnem culpam in miserum comitem infundentes.

~~Quando ad obsidionem [g] Imolae iverunt Bononienses
et Faventini, et reaedificaverunt castrum Sancti Cassiani et castellum Imolae.~~

CAP. XLVII.

In illo tempore, quo cum Ravennatibus Faventini guerram habebant, censum, quem eis et Bononiensibus Imolenses debebant, utrisque denegaverunt penitus, et toto tempore guerrae, ut iuramento tenebantur, nullum Faventinis [h] contra inimicos exhibuere solatium. Hac itaque iustissima occasione, anno Domini MCXLVIII, Bononienses et Faventini guerram Imolensibus facere ceperunt. Civitatem vero prope sex menses obsidentes, arbores, vineas, segetes a quinto miliario usque ad foveam [i] inciderunt omnino. Castrum autem Sancti Cassiani et castellum [A] Imolae quod Imolenses destruxerant, revocatis habitatoribus, infra annum et dimidium reaedificaverunt, unde hostes affligebant non modicum [j].

~~De secunda destructione castelli Imolae [k].~~

CAP. XLVIII.

Anno post Virginis partum MCL [l] die XIII mensis Octobris, scientes Imolenses quod pauci derelicti fuerant ad custodiendum castellum Imolae, in prima hora noctis

[a] in populo nunciare. Sic Cod. M.; an in omittendum? — [b] Libenter obedierunt, C. V. et Cl. Mitt. In C. M., libenter obedirent. — [c] chari magistri. In C. M., kari magistri. — [d] cum Ravennatibus composuisset, Codd. M. et V. et cl. Mitt. Subintellige, ut supra monui, res, vel se. — [e] dare debebat. Sic legendum. Codd. habent dare debebant. — [f] sapientes cum insipientibus. In C. M., sapientes cum insipientibus. — [g] Quando ad obsidionem, etc. Titulus hic forte evanuit in C. M., praeter voces Bononienses et Faventini. Supplevi igitur, ut vides, sed diverso a consueto caractere. In C. V. omnino deest. — [h] nullum Faventinis, Codd. M. et A. In C. V., in illum Faventinis. — [i] usque ad foveam. An hic fovea, qua urbis moenia egebantur, intelligenda? — [j] non modicum, C. M.; non modice, C. V. — [k] castelli Imolae. In titulo, post castelli, C. M. habet lacunam, quam supplevi ex aliis codicibus, verbo Imolae. — [l] Anno post Virginis partum MCL. Sic Codd. In vers. Ital. Gregorii Zucculi, hoc caput refertur ad annum MXLVIII.

[A] Castrum S. Cassiani et castellum Imolae, loca siquidem munita, non procul ad urbe Imolensi, nunc omnino destructa. De castro S. Cassiani jam supra. Quod attinet ad castellum Imolae, hoc erat citra flumen Santernum, quod Imolae proximum est. Vide Cap. seq.